



Reformations
de
Luiset
Paris

63

51

Licences de ce Recueil

*Commission de 1666. pour la Reformation
de l'Université.*

*Arrêt du Parlement de
1689. portant Règlement
p^r le chappelle du Coll. de Beausais.
De Beausais.*

Memoire p^r Mr Quenon

*Contre Mr Goussier, qui demandoit la Procure de Normandie en 1679.
factum p^r les Professeurs mariés, & Reflexions, & Des Vies.*

*factum de la N. de France, Contre M. Du Mesny, qui pretendoit jouir
du droit d'Emerite, s'étant fait Docteur.*

Instruction, ou Memoire pour Mr Du Boulay, contre M. Remy Duret.

Memoire, qui cite les Licences Indulgences des Messagers

memoire de Paquet

*Bourgeois, contre
le Chantre.*

memoire

*Memoire de M. Remy Duret, pour la Censure de France.
Seconde Partie. Du factum de la N. de France, Contre les Principaux Docteurs.
Vies pour les Professeurs mariés.*

Arrêt de l'Université, Contre M. Le Chantre.

Seconde Partie, Reponse aux Objections.

factum, de la faculté des Arts, Contre les gens mariés.

factum Contre le Septennium des Professeurs de Theologie.

Statuta Gen. Nat. Gall. 1661.

*Etat du College de Dormans, Vit de Beausais, par Jean Goussier, Pat.
1621.*

Tarif des Expéditions de Cur de Rome

faustulus, Tragedia, in Portu Blesavo, 1681.

Emile de Lise, p^r l'affaire de, Corres 1664.

Bartholomew





FACTVM,

POVR Maistre Iacques Bourgeois, deffendeur & incidemment demandeur.



CONTRE la Communauté des petites Escholes, & particulièrement contre François Baste, dict Melesville, l'un desdicts Maistres, demandeurs & deffendeurs. ¹⁰

IL y a cinq ou six sepmaines que François Baste, dict de Melesville, disciple, estant ieune, & domestique il y a deux ans & demy, ou enuiron, du Sieur Bourgeois, poussé de haine & d'enuie, s'aduifa de le faire assigner pardeuant Monsieur le Chantre de Paris, comme n'ayant aucun droict de tenir des Pensionnaires, sans la permission par escript dudit Sieur Chantre.

Le deffendeur qui a tenu des Pensionnaires, il y a plus de vingt ans, qui en a eleué vn grand nombre avec beaucoup de bon-heur & de succez, qui a regenté publiquement, & à Bordeaux au College Royal de Guyenne, & à Paris au College de Beauuais, où il a fait la Rhetorique & la Philosophie, qui est Maistre és Arts & Historiographe de sa Majesté, fut estonné de l'action de ce ieune homme qui luy doit du respect, & qui luy a plusieurs obligations. Il pouuoit obtenir son renuoy pardeuant Monsieur le Lieutenant Ciuil, comme Maistre és Arts, mais il aima mieux le demander pardeuant Messieurs des Requestes de l'Hostel, en vertu de son Committimus fondé sur sa qualité d'Historiographe de sa Majesté. Les demandeurs contesterent son Priuilege, mais nonobstant leur contestation la cause fust retenuë.

Le deffendeur s'imaginoit qu'ils poursuiuoient aux Requestes de l'Hostel, ou qu'ils appelleroient de la retention de la

cause pardeuant Nosseigneurs du Parlement, mais ils en vse-
rent bien d'un autre maniere. Le 26. iour de Septembre, deux
Maistres de la Communauté des petites Escholes nommez
Beauchamp & le Cuiret, accompagnez d'un Huissier, & de huit
tant Archers que Soldats des Gardes, se jetterent avec vio-
lence & pleins de vin (car ils sortoient du cabaret, où ils auoient
esté traittez par Melesville) dans la maison du deffendeur,
l'outragerent de fait & de parole, & ses Escholiers aussi enfans
de condition & de naissance, & enleuerent quelques Histo-
riens, comme des Iustins, Quintes Curce, Turcelins, & des
Poëtes comme Virgile, Terences, Plaute, & avec ceux cy plu-
sieurs Dictionnaires, Despautaires & Rudiments.

Tout cela se fit à l'instigation de Melesville ce bon disciple &
domestique cy-deuant du deffendeur, esprit fougueux, tur-
bulent & seditieux, comme il appert par quantité d'autres
actions violentes qu'il a faites, par exemple d'auoir fait des-
pouiller vne ieune fille en chemise, & luy auoir présenté le pisto-
let dans vne partie que la bien sceance ne permet pas de nom-
mer, pour luy faire auouer vn crime dont elle se trouua in-
nocente, qui estoit d'auoir pris vne piece de trente sols;
d'auoir fait violence aux Pensionnaires du Sieur Sauary, ayant
esté condamné pour cette action par Arrest du Parlement à
aumosner vne certaine somme aux pauures de la Conciergerie,
avec deffences de recidiuer à de tels actes, sous peine de puni-
tion exemplaire. Nonobstant lesquelles deffences, il n'a pas
laissé du depuis d'outrager à la sortie & de l'Eglise & de la sain-
cte Communion vn ieune homme Pensionnaire du deffendeur,
comme l'on peut voir par les informations.

Le pretexte de cette derniere insulte fut vn Arrest du Par-
lement de l'an 1628. duquel le deffendeur n'auoit aucune con-
noissance, qu'ils ne luy auoient point au prealable signifié, dont
ils ne luy laisserent aucune coppie, & duquel mesme ils ne luy
firent pas lecture. Cét Arrest porte en substance, comme le
deffendeur a sceu du depuis, que personnes ne pourroit tenir
petites Escholes, sans la permission de Monsieur le Chantre de
Paris.

A cela le deffendeur respond, qu'il ne tient point Escoles, &

que quand il en tiendrait, il a droit de le faire, sans la permission de Monsieur le Chantre.

Pour ce qui est du premier point, il le prouve. Premièrement, pource que ceux qui tiennent Escholes, font vne profession publique, de laquelle ils aduertissent le public par des Tableaux ou par des Affiches, & reçoivent des externes qui vont & viennent; Mais ceux qui tiennent des Pensionnaires qu'ils enseignent en particulier, & *intra privatos parietes*, sans y admettre d'externes, sans Affiches, & sans Tableaux, ne font pas vne profession publique; l'on ne peut donc pas dire qu'ils tiennent Escoles.

En second lieu, ie leur demande, N'est-il pas permis à qui que ce soit de prendre des Pensionnaires pour les nourrir, & pour les loger? Ils l'aduouent dans leurs repliques. Je leur demande, en second lieu, ceux qui tiennent des Pensionnaires ne les peuvent-ils pas entoyer dans des maisons ou dans de petites Escoles pour y recevoir de l'instruction? ils disent encores que ouï; Mais ne peuvent-ils pas aussi tenir des Maistres dans leur maison pour les instruire, sans permission de personne? Ils ne le scauroient nier, puisque c'est vne pratique ordinaire. Le deffendeur donc peut loger & nourrir des Pensionnaires dans sa maison, & prendre des Maistres pour les instruire, sans autre permission; & si luy-mesme est aussi scauant que ceux qu'il employe pour cela, Pourquoi voulez vous qu'il ne le puisse faire luy-mesme? cela ne souffre point de response.

En troisieme lieu, ie tiens pour asseuré que dans aucun des Arrests du Parlement, qui deffendent de tenir petites Escoles sans permission de Monsieur le Chantre, il ne s'en trouuera pas vn seul qui deffende de tenir des Pensionnaires en sa maison pour les instruire.

En quatrieme lieu, Tout Paris est plein de personnes qui ont des Pensionnaires, & qui leur enseignent diuerses choses, sans passer pour Maistres d'Escoles, & sans en estre recherchez; ce qui est vne marque que la chose est permise, & se peut faire; Car quand vne chose se fait communément, au sceu & à la veüe des Magistrats, sans qu'ils la blasment ou l'empeschent, c'est signe qu'ils y consentent, & qu'ils l'approuent. Il est donc

constant que tenir des Pensionnaires en sa maison pour les instruire, n'est point proprement tenir Escoles; que tout le monde le peut faire sans permission, & que plusieurs le font avec l'approbation tacite des Magistrats, & des Parlements, qui sont les Protecteurs des Sciences & des gens Doctes; Et voila pour le premier poinct.

Pour le second poinct, qui est, que quand tenir Pensionnaires feroit la mesme chose que tenir Escoles, le deffendeur le peut faire sans permission de Monsieur le Chantre; cela se prouue.

Premierement, pource que le deffendeur est Maistre és Arts, & peut par consequent enseigner sans autre permission par tout *ubique terrarum*. Mais ils opposent que les Maistres és Arts ont bien l'autorité d'enseigner *ubique terrarum*, mais que neantmoins ils ne le peuuent faire dans la Iurisdiction d'un autre, sans qu'il leur en donne permission; & ainsi la Iurisdiction de Monsieur le Chantre s'estendant dans Paris & dans les Faux-bourgs, l'on ne peut tenir des Pensionnaires, si ce n'est qu'il le permette; Mais on respond que cela se doit entendre pour les petites Escoles seulement, & non pas pour les grandes, autrement la Iurisdiction de Monsieur le Chantre s'estendrait dans les Colleges, puisque les Colleges sont dans Paris. Que s'il se trouue des Maistres és Arts qui ayent pris permission de Monsieur le Chantre, ç'a esté pour tenir petites Escoles; ce que le deffendeur ne fait pas.

Ils opposeront, en second lieu, que le deffendeur tient petites Escoles, puis qu'il fait enseigner chez soy les basses lettres à des enfans. Mais il est facile de respondre à cette objection, qui est foible, S'il enseignoit seulement les basses lettres, cela peut-estre seroit vray; Mais quand on enseigne les belles Lettres & les Sciences, si l'on s'abaisse quelquefois à l'explication des Principes qui disposent à les apprendre, l'on n'est pas censé pour cela Maistre de petites Escoles; Vn Conseiller qui est Aduocat ne passe pas pour Aduocat; L'on n'appelle point un Prestre Diacre ou Sous-Diacre, quoy qu'il le soit veritablement; & quand un Capitaine dans un Combat fait l'Office non seulement de Capitaine mais de Soldat, il ne perd pas sa qualité de Capitaine *Denominatio fit à nobiliori parte.*

Le deffendeur n'accorde pas pour cela qu'il en seigne les basses lettres, n'y ayant chez luy qu'un sien petit neveu qui apprend à lire, & pour l'écriture, il ne s'en mesle point du tout, mais fait venir un Maître de Paris pour cela, comme l'on fait dans les Colleges. Ils opposeront enfin que le deffendeur enseigne la Grammaire, ce qui est du faict des petites Ecoles; Mais il faut nier cette proposition comme tres-fausse; car si elle estoit veritable, le College des Reuerends Peres Iesuites, & ceux de l'Vniuersité seroient de petites Ecoles, puis qu'en chacun il y a quatre ou cinq Classes pour la Grammaire. Le deffendeur donc ne tient point Ecoles, n'ayant que des Pensionnaires & point d'externes; & quand cela s'appelleroit tenir Ecoles, enseignant comme il fait la Rhetorique & Philosophie, il seroit reputé tenir grandes Ecoles, & non pas petites Ecoles, & par la permission de Monsieur le Chantre ne luy est du tout point necessaire.

En second lieu, la qualité que le deffendeur a d'Historiographe du Roy, le rend independant de tout autre que du Roy & du Parlement; Aussi n'ont-ils point repliqué à cette raison, comme tres-forte & tres-euidente. Il est bien iuste que les Officiers des Rois ayent des priuileges & des prerogatiues particulieres, ce qui se fait aussi, comme l'on pourroit faire voir par vne induction de tous les Officiers de la Couronne.

Le deffendeur ne se contente pas de faire voir par toutes les raisons precedentes le pouuoir qu'il a de tenir des Pensionnaires, & des externes mesmes s'il vouloit, il soustient que les demandeurs n'ont aucun droit de tenir Ecoles grandes ou petites: Ce qu'il prouue par vn Arrest de 1654. qu'ils alleguent eux-mesmes dans leurs repliques; Par lequel Arrest il est enjoint expressément à Monsieur le Chantre de ne commettre aux petites Ecoles que des personnes qualifiées, & qui soient Maîtres es Arts à tout le moins; D'où ie conclus qu'il n'y a pû commettre la pluspart des demandeurs, & particulièrement de Melesuille, qui n'a aucun degré ny qualité, ny capacité non plus, ne sçachant pas mesme lire en Latin; comme il montra Lundy dernier 15. du mois d'Octobre, n'ayant pû lire trois lignes de Latin sans faillir, en la presence de sept ou huit person-

nes qui admirerent son ignorance. Ne tenant donc petites Escoles que par la permission de Monsieur le Chantre, & cette permission estant nulle, comme contreuenant à l'Arrest du Parlement, il s'ensuit qu'ils n'ont aucun droit de tenir Escoles.

Pour ce qui est de la Prouision qu'ils demandent dans le Parlement sommairement, elle n'a pas la moindre apparence de raison & d'equité; Car en leur accordant ce qu'ils demandent, on iugeroit le fonds en mesme temps. Il est question de sçauoir si le deffendeur tient petites Escholes; Les demandeurs disent que ouïy, & le deffendeur prouue le contraire par beaucoup de fortes raisons. Il est question de sçauoir si le deffendeur peut enseigner en particulier *intra priuatos parietes* ses Pensionnaires, il dit qu'il le peut, & le prouue, & les demandeurs taschent de prouuer le contraire. Pour sçauoir donc qui a raison, il faut attendre que la chose soit decidée, & non pas vouloir qu'en vous ordonnant vne prouision, on le condamne, pour ainsi dire, auant que de le condamner; Ce qui ne seroit pas moins iniuste, que si vn homme qui se diroit creancier d'un autre, vouloit par prouision qu'on faist les biens de celuy qu'il pretend son debiteur, ou qu'on le mist en prison, auant que d'auoir pû montrer que l'autre luy est redeuable; Cela supposé, le demandeur conclud à ce que

Premierement, on luy laisse la liberté de continuer ses exercices, comme il a fait plusieurs années sans l'inquieter & le troubler, & sans permission de Monsieur le Chantre, laquelle neantmoins il ne refuse pas de receuoir, si on iuge qu'il y soit obligé, pourueu qu'en mesme temps on enjoigne à Monsieur le Chantre de luy donner ladite permission, ou que l'Arrest soit tenu pour permission. Et pour ce que Melesuille objecte, que par ce moyen ils seroient deux en mesme quartier; L'on respond, 1. Que les permissions ne sont attachées à aucun quartier. 2. Que si cela estoit, Messieurs Vincharge & Sauary plus anciens que luy, pourroient chasser Melesuille, qui n'a ses Lettres que depuis vn an ou deux. 3. Que ledit Melesuille ne doit point parler de quartier, puis qu'il n'enseigne aucun enfant du quartier, mais les neglige pour aller à la queste tous les iours, comme il fait, de Pensionnaires qu'il tire de diuers endroits, fru-

strant par ce moyen les autres Maistres de ces quartiers. 4. Que le deffendeur est plus ancien qu' luy, & ne pouuoit pas deuiner si Melesuille sortant de sa maison s'aduiferoit de se faire Maistre de petites Escoles, dont il estoit tres-incapable.

Secundò, Le deffendeur conclud, qu'on luy rende les Liures, & autres choses qu'on luy a enleuées avec autant de violence que d'iniustice.

Tertiò, Qu'on repare l'outrage & l'iniure qu'on luy a faite.

Quartò, Que les demandeurs soient condamnez à tous les despens, & aux dommages que le deffendeur en a receus.

Quintò, Qu'il soit enjoint à Monsieur le Chantre de reuoker les permissions à tous ceux qui n'ont aucune qualité, & principalement à François Baste de Melesuille, pour la donner à quelque personne bien qualifiée, & qui soit plus propre que luy à l'instruction de la jeunesse.

Faint, illegible text, possibly bleed-through from the reverse side of the page. The text is arranged in several lines and appears to be a formal document or letter.